

共同經課-1 以賽亞書四十二章二十一節～三十一節

21 恁豈未知嗎？恁豈未聽見嗎？對起頭豈無給恁講嗎？對設立地的根基恁豈無明白嗎？22 主坐佇地的大圈；地上倚起的百姓親像草蜃。伊展開天親像帳幅，安置伊親像通倚起的布棚。23 伊互君王歸佇無，互地上的審判官成做空虛。24 in 是抵仔栽，抵仔種，伊的櫟抵仔釘根佇地裡，伊一下吹佇伊頂面，就攏枯焦；捲螺風將伊吹去，親像草幼一樣。25 至聖者講：恁欲用是誰比並我，互我及伊平啊？26 恁抬目看頂面，看是誰創造諸個，照數目導許個萬軍出來，伊一個一個稱 in 的名；因為伊的權能，閣因為伊的大權能大氣力，連一個亦無欠。27 雅各啊，你啥事講，以色列啊，你啥事講，我的道路隱密佇耶和華？我的案件無得著上帝料理？28 你豈未知嗎？你豈未聽見嗎？永永佇啲的上帝耶和華，創造地極者，伊無厭，亦無倦；伊的智慧無通測度。29 厭倦者，伊互伊能力；軟莖者，伊加添伊的氣力。30 少年人亦會厭會倦；勇壯的人亦會跋倒。31 獨獨倚靠耶和華者欲得著新的氣力。in 欲親像鷹鳥展翅飛高；in 走亦無厭，行亦無倦。

共同經課-2 詩篇一四七篇一節～十一節，二十 c 節

1 恁著謳啞耶和華！因為唱歌謳啞咱的上帝是真好真妙；謳啞是合宜。2 耶和華起造耶路撒冷，聚集以色列中受遷徙的人。3 伊醫好傷心的人，包 in 的傷。4 伊算星辰的數額，隨粒給伊號名。5 咱的主至大，極有氣力；伊的智慧無窮盡。6 耶和華扶持謙卑的人，將歹人降低到土腳。7 恁著用感謝向耶和華唱歌，彈琴唱歌謳啞咱的上帝。8 伊起雲遮天，為著地備辦雨，互山發草。9 伊賞賜食物互走獸及啲啲的烏鴉子。10 伊無意愛馬的力大，伊無歡喜人的腳夯(Gâu)走。11 耶和華是歡喜敬畏伊，及向望伊慈愛的人。20c 恁著謳啞耶和華！

共同經課-3 哥林多前九章十六節～二十三節

16 我傳福音毋是通誇口的事，是不得已若定。因為若無傳福音，我就有災禍。17 我若甘心做此個事，就有報賞；就若毋甘心，有職任已經交代我啦。18 按呢，我的報賞是甚麼啊？就是我啲傳福音互人免所費也會得著福音，免得我佇福音所有的權用到盡。19 我對佇眾人雖罔是自由，猶久將家己做眾人的奴僕，為著欲得著人愈多。20 向猶太人，我就親像猶太人，欲得著猶太人；向法下的人，我雖然本身無屬佇法下，就親像法下的人，欲得著法下的人。21 向法外的人，我就親像法外人，欲得著法外的人；其實我毋是佇上帝的法外，就是佇基督的法內。22 向軟弱的人，我就成做軟弱，欲得著軟弱的人。向逐號人，我成做逐號款，一概是欲救人。23 逐項事，我因為福音來行，是互我通相及有份佇福音。

共同經課-4 馬可福音一章二十九節～三十九節

29 in 已經出會堂，隨時及雅各、約翰，入西門及安得烈的家。30 西門的丈姆患著熱病倒啲，隨時有人將這給耶穌講。31 伊近倚牽伊的手，互伊起來，熱就退，婦仁人就伺候 in。32 到黃昏暗，日落了，有人導攏總有破病的，及患著鬼的人，就近伊。33 通城攏聚集佇門口。34 耶穌醫好逐樣病的人多多，閣趕多多鬼，因為鬼識伊，所以毋准 in 講。35 隔早起，天猶不止暗，耶穌起來，出去曠野的所在，佇遐祈禱。36 西門及同伴的人追尋伊，37 已經抵著就給伊講：「眾人攏啲尋你。」38 伊給 in 講：「咱來去別位，到附近的埠頭，互我通佇遐傳道，因為我為著此個事才出來。」39 就去遍加利利，入 in 的會堂，宣傳道理，閣趕鬼。